

УЧИНЧИ БЎЛИМ

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

387 Шахсларнинг айрим тоифаларини имтиёзли асосда дори воситалари билан таъминлаш тартибини янада такомиллаштириш чора-тадбирлари тўғрисида

Ўзбекистон Республикасининг «Фуқароларнинг соғлиғини сақлаш тўғрисида» ҳамда «Дори воситалари ва фармацевтика фаолияти тўғрисида»ги қонунларига мувофиқ, шунингдек айрим тоифадаги шахсларни имтиёзли асосда дори воситалари билан таъминлаш тартибини янада такомиллаштириш мақсадида Вазирлар Маҳкамаси **қарор қилади:**

1. Қуйидагилар тасдиқлансин ва 2013 йил 1 сентябрдан бошлаб амалга киритилсин:

Амбулаторияда даволанишда дори воситалари билан имтиёзли таъминлаш ҳуқуқига эга бўлган шахслар тоифалари рўйхати 1-иловага мувофиқ;

Амбулаторияда даволанишда шахсларнинг айрим тоифаларини дори воситалари билан имтиёзли таъминлаш тартиби тўғрисидаги низом 2-иловага мувофиқ.

2. Ўзбекистон Республикаси Соғлиқни сақлаш вазирлиги:

ушбу қарор билан тасдиқланган Рўйхат ва Низомнинг давлат соғлиқни сақлаш тизими тиббиёт муассасаларига ва дорихона муассасаларига етказилишини;

бир ой муддатда Молия вазирлиги билан биргаликда амбулаторияда даволанишда имтиёзли таъминлаш учун мўлжалланган дори воситаларининг рўйхати тасдиқланишини, шунингдек идоравий норматив-ҳуқуқий ҳужжатларнинг ушбу қарорга мувофиқлаштирилишини;

давлат соғлиқни сақлаш тизими тиббиёт муассасалари ва дорихона муассасалари томонидан ушбу қарор талабларига риоя этилиши устидан назоратни таъминласин.

3. Вазирлар Маҳкамасининг «Республикада дори-дармонлар ва тиббий буюмлар билан таъминлашни ва уларни тақсимлашни яхшилашга доир кечиктириб бўлмайдиган чора-тадбирлар тўғрисида» 1994 йил 6 августдаги 404-сон қарорига 3-иловага мувофиқ ўзгартиришлар киритилсин.

Ўзбекистон Республикаси Ҳукуматининг 4-иловага мувофиқ айрим қарорлари ўз кучини йўқотган деб ҳисоблансин.

4. Мазкур қарорнинг бажарилишини назорат қилиш Ўзбекистон Рес-

публикаси Бош вазирининг ўринбосари А.И. Икромов зиммасига юклансин.

**Ўзбекистон Республикасининг
Бош вазири**

Ш. МИРЗИЁЕВ

Тошкент ш.,
2013 йил 22 июль,
204-сон

Вазирлар Маҳкамасининг
2013 йил 22 июлдаги 204-сон қарорига
1-ИЛОВА

**Амбулаторияда даволанишда дори воситалари билан имтиёзли
таъминланиш ҳуқуқига эга бўлган шахслар тоифалари
РЎЙХАТИ**

1. Онкологик касалликларга чалинганлар.
2. Сил касаллигига чалинганлар.
3. Мохов касаллигига чалинганлар.
4. Эндокринологик касалликларга (қандли ва қандсиз диабетга) чалинганлар.
5. Рухий касалликларга чалинганлар.
6. ОИВ касаллигини юқтирганлар.
7. Юрак клапанини протезлаш ва органларни кўчириш юзасидан операция қилинган шахслар.
8. Ўзгалар парваришига муҳтож ёлғиз пенсионерлар.
9. 1941 — 1945 йиллардаги уруш ногиронлари ва қатнашчилари, шунингдек уларга тенглаштирилган шахслар.
10. 1941 — 1945 йиллардаги уруш меҳнат fronti қатнашчилари.
11. Чернобиль АЭСидаги ҳалокат оқибатларини тугатишда қатнашган ногирон шахслар.
12. Байналмилалчи жангчилар.
13. Ҳарбий хизматни ядро полигонларида ва бошқа радиация-ядро объектларида ўтаган пенсия ёшидаги шахслар.

Вазирлар Маҳкамасининг
2013 йил 22 июлдаги 204-сон қарорига
2-ИЛОВА

**Амбулаторияда даволанишда шахсларнинг айрим
тоифаларини дори воситалари билан имтиёзли
таъминлаш тартиби тўғрисида
НИЗОМ**

I. Умумий қоидалар

1. Ушбу Низом «Фуқароларнинг соғлиғини сақлаш тўғрисида» ҳамда «Дори воситалари ва фармацевтика фаолияти тўғрисида»ги Ўзбекистон Республикаси қонунларига мувофиқ соғлиқни сақлаш давлат тизимининг амбулатория-поликлиника муассасаларида амбулаторияда даволанишда шахсларнинг айрим тоифаларини дори воситалари билан имтиёзли таъминлаш тартибини белгилайди.

2. Ўзбекистон Республикаси Вазирлар Маҳкамаси томонидан тасдиқланадиган рўйхатга мувофиқ шахслар амбулаторияда даволанишда дори воситалари билан имтиёзли таъминланиш ҳуқуқига эга бўладилар.

3. Амбулаторияда даволанишда шахсларнинг айрим тоифаларини (кейинги ўринларда беморлар деб аталади) дори воситалари билан имтиёзли таъминлаш дори воситаларини амбулатория-поликлиника муассасалари орқали ёхуд дорихона муассасалари орқали бериш йўли билан амалга оширилади.

4. Беморларга дори воситаларини имтиёзли бериш беморлар амбулатория тартибида даволанадиган амбулатория-поликлиника муассасасида даволловчи врачларнинг тайинлаши бўйича бепул берилади.

5. Беморларга дори воситаларини имтиёзли бериш дорихона муассасалари томонидан бемор амбулатория тартибида даволанадиган амбулатория-поликлиника муассасасида даволловчи врач томонидан ёзилган имтиёзли бериш рецепти (кейинги ўринларда рецепт деб аталади) асосида бепул берилади.

6. Амбулаторияда даволанишда имтиёзли таъминлаш учун мўлжалланган дори воситалари рўйхати Ўзбекистон Республикаси Соғлиқни сақлаш вазирлиги томонидан Молия вазирлиги билан биргаликда белгиланади.

II. Дори воситаларини имтиёзли бериш тартиби

7. Тиббий хизмат кўрсатиш учун амбулатория-поликлиника муассасаларига бириктирилган беморларга имтиёзли бериш учун мўлжалланган дори воситалари ушбу муассаса раҳбарининг буйруғи билан белгиланган масъул шахс томонидан берилади.

8. Дори воситаларини имтиёзли бериш даволловчи врачларнинг тайин-

лашига мувофиқ дори воситаларини ҳисобга олиш учун белгиланган шакл бўйича талаблар асосида амалга оширилади.

9. Талабнома амбулаторияда даволанишда дори воситалари билан имтиёзли таъминланиш ҳуқуқини тасдиқлайдиган ҳужжат (ҳужжатлар) асосида ёзилади.

Талабнома дори воситасининг савдо номи, ўрам тури, кадоқлаш ва шу кабилар кўрсатилган ҳолда икки нусхада ёзилади. Талабнома амбулатория-поликлиника муассасасининг раҳбари ёки унинг ўринбосари томонидан имзоланиши ва думалоқ муҳр билан тасдиқланиши керак. Талабноманинг биринчи нусхаси (дори воситалари олинганлиги тўғрисида масъул шахснинг тилхати билан биргаликда) амбулатория-поликлиника муассасаси дорихонасида қолади, иккинчи нусхаси эса — масъул шахс дори воситаларини олганидан кейин унга қайтарилади.

10. Масъул шахс дори воситалари олинганидан кейин уларни махсус журналда тилхат остида беморга беради. Вояга етмаган беморларга мўлжалланган дори воситалари уларнинг ота-оналарига ёки уларнинг ўрнини босувчи шахсларга берилади. Айрим ҳолларда вояга етган беморнинг ҳолатига қараб дори воситалари унинг қариндошларига берилиши мумкин.

11. Талаб этиладиган дори воситаси амбулатория поликлиника-муассасасида мавжуд бўлмаган тақдирда даволовчи врачлар уларни дорихона муассасаларидан имтиёзли бериш учун рецептлар ёзадилар.

III. Дори воситаларини имтиёзли ажратиш тартиби

12. Дорихона муассасаларидан дори воситаларини имтиёзли ажратиш Ўзбекистон Республикаси Соғлиқни сақлаш вазирлиги томонидан тасдиқланадиган шакл бўйича бланкаларда даволовчи врачлар томонидан ёзилган рецептлар бўйича амалга оширилади.

13. Рецептни олиш учун беморлар (ота-оналар ёки уларнинг ўрнини босувчи шахслар, қариндошлар) амбулаторияда даволанишда дори воситалари билан имтиёзли таъминланиш ҳуқуқини тасдиқлайдиган ҳужжатни (ҳужжатларни) кўрсатган ҳолда беморлар ҳисобда турадиган жойдаги ёки тиббий хизмат кўрсатиш учун бириктирилган жойдаги амбулатория-поликлиника муассасасига мурожаат қиладилар.

14. Рецептда дори воситалари даволашнинг бир курсидан ортик бўлмаган миқдорда тиббий кўрсаткичлар бўйича ёзилади. Рецепт берилган кундан бошлаб бир ой мобайнида ҳақиқийдир.

15. Қуйидаги дори воситаларига рецептлар ёзиш ушбу муассасанинг мутахассис врачлари ёки тегишли ихтисослаштирилган даволаш-профилактика муассасалари врачларининг тавсиялари асосида яшаш жойидаги амбулатория-поликлиника муассасасининг даволовчи врачлари (умумий амалиёт врачлари) томонидан амалга оширилади:

ўсмага қарши ва гиёҳвандлик воситалари (онкологик, гематологик беморларга) — онколог ва (ёки) гематологнинг тавсияси асосида;

қандли диабет ва қандсиз диабетга дучор бўлган беморларни даволаш воситалари — эндокринологнинг тавсияси асосида;

психотроп воситалар (руҳий касалликларга чалинган беморларга) — психиатрнинг тавсияси асосида;

инфекцияга қарши препаратлар (ОИВни юқтирган беморларга) — амбулатория-поликлиника муассасаси хузуридаги юқумли касалликлар хонасининг инфекционист врачининг тавсияси асосида;

силга қарши воситалар (силга чалинган беморларга) — фтизиатрнинг тавсияси асосида.

16. Рецепттура бланкаларини тўлдириш, дорихона муассасалари томонидан рецептларни расмийлаштириш, рецепттура бланкаларини ва дори воситаларини бепул бериш учун ёзилган рецептларни ҳисобга олиш, сақлаш ва йўқ қилиш Ўзбекистон Республикаси Соғлиқни сақлаш вазирлиги томонидан белгиланган тартибда амалга оширилади.

17. Дорихона муассасаларидан бериладиган дори воситаларининг миқдори ва дозаси (ўлчами) рецептда кўрсатилган миқдор ва дозага мувофиқ бўлиши керак.

18. Дори воситасини беришда рецептнинг йиртиб олинadиган корешокларига берилган дори воситасининг номи, миқдори, серияли рақами, фармацевтнинг фамилияси, исми, отасининг исми ёзилади, унинг имзоси қўйилади. Дорихона муассасасининг штампси босилади. Бемор орқа томондаги биринчи йиртиб олинadиган корешокка имзо чекади, у кейинчалик уни ҳақ тўлаш учун амбулатория-поликлиника муассасасига тақдим этиш учун дорихона муассасасида сақланади. Иккинчи корешок беморга (ота-оналарга ёки уларнинг ўрнини босувчи шахсларга, қариндошларга) берилади.

19. Дорихона муассасаларида умумий қабул қилинган халқаро-патентланмаган ном ҳисобга олинган ҳолда савдо номи бўйича тайинланган дори воситаси мавжуд бўлмаган тақдирда, янгидан ёзилган рецепт асосида фақат амбулатория-поликлиника муассасасининг раҳбари (унинг ўринбосари) билан келишган ҳолда бошқа савдо номи билан дори воситасига синонимик алмаштирилиши мумкин.

Бунда рецептнинг орқа томонига ушбу дори воситасининг мавжуд эмаслиги тўғрисида белги (фармацевт ходимнинг фамилияси, исми, отасининг исми ва имзоси, сана, дорихона муассасасининг номи ва штамп) қўйилган ҳолда кейинчалик уни амбулатория-поликлиника муассасасига тақдим этиш учун беморга берилади.

20. Дори воситасининг зарур миқдори мавжуд бўлмаган ҳолларда беморга рецептларнинг йиртиб олинadиган корешокларининг тегишли устунларида кўрсатилган ҳолда мавжуд дори воситаси миқдори берилади.

21. Рецепт нотўғри расмийлаштирилган тақдирда унга дорихона муассасасининг фармацевт ходимлари томонидан «Рецепт ҳақиқий эмас» деган штамп босилади, кейинчалик у амбулатория-поликлиника муассасасига тақдим этиш учун беморга (ота-оналарга ёки уларнинг ўрнини босувчи шахсларга, қариндошларга) қайтарилади.

IV. Дори воситалари билан имтиёзли таъминлаш бўйича харажатларни молиялаштириш (ҳақ тўлаш) тартиби

22. Соғлиқни сақлаш ҳудудий бошқарув органи ёки амбулатория-поликлиника муассасаси тасдиқланган харажатлар сметасига мувофиқ олдиндан танлов, тендер ёки электрон савдолар ўтказмасдан, шунингдек махсус ахборот порталларида эълон бермасдан ёзилган рецептлар асосида беморларга берилган дори воситалари қийматини тўлаш учун дорихона муассасалари билан тўғридан-тўғри шартномалар тузади.

Шартномалар (битимлар) белгиланган тартибда Ҳазначиликнинг ҳудудий бўлинмаларида рўйхатдан ўтказилади.

23. Соғлиқни сақлаш ҳудудий бошқарув органи ёки амбулатория-поликлиника муассасаси шартнома суммасидан ва бюджетнинг тасдиқланган сметасидан келиб чиқиб ойлик сумманинг 15 фоизи миқдоридан ҳар ойда олдиндан ҳақ тўлайди.

24. Ҳар ойда кейинги ойнинг 10-кунигача дорихона муассасалари томонидан имтиёзли рецептлар бўйича берилган дори воситалари реестрлари тузилади, улар счё-фактура ва биринчи йиртиб олинган корешоклар билан биргаликда соғлиқни сақлаш ҳудудий бошқарув органига ёки амбулатория-поликлиника муассасасига тақдим этилади. Реестрлар ушбу Низомга иловага мувофиқ шакл бўйича ҳар бир амбулатория-поликлиника муассасаси бўйича уч нусхада тузилади.

25. Реестрнинг икки нусхаси ҳақ тўлаш учун тақдим этилади. Реестрнинг учинчи нусхаси счё-фактура, реестрнинг икки нусхаси ва рецептларнинг биринчи йиртиб олинган корешоклари олинганлиги тўғрисида соғлиқни сақлаш ҳудудий бошқарув органи ёки амбулатория-поликлиника муассасасининг масъул шахси томонидан имзоланади.

26. Соғлиқни сақлаш ҳудудий бошқарув органи ёки амбулатория-поликлиника муассасаси ва дорихона муассасаси ўртасидаги кейинги ҳисоб-китоблар йиртиб олинган корешоклар ва ёзилган счё-фактуралар илова қилинган ҳолда ҳисобот оyi тамом бўлгандан кейин навбатдаги календарь ойнинг 15-кунигача тақдим этилган реестрга мувофиқ амалга оширилади.

Бунда счё-фактуралар, тўлов топшириқлари билан биргаликда реестрлар Ҳазначиликнинг ҳудудий бўлинмаларига тақдим этилади.

27. Соғлиқни сақлаш ҳудудий бошқарув органларига ёки амбулатория-поликлиника муассасаларига рецептнинг йиртиб олинган корешоклари, счё-фактуралар ва тўлдирилган реестр мавжуд бўлган тақдирда берилган дори воситалари бўйича тўлиқ суммани дорихона муассасаларига бир марта тўлашга рухсат берилади.

28. Шахсларнинг айрим тоифаларига дори воситаларини имтиёзли бериш бўйича харажатларни молиялаштириш тегишли бюджетлар маблағлари ҳисобига амалга оширилади.

29. Дори воситаларини беморларга имтиёзли бериш учун амбулатория-поликлиника муассасаси:

уларни муассасанинг харажатлар сметасида ушбу мақсадларда назарда тутилган режали ажратиладиган маблағлар ҳисобига харид қилади;

уларни бюджетдан ташқари маблағлар ҳисобига харид қилади;

уларни тақсимот бўйича соғлиқни сақлашнинг юқори органларидан бепул олади;

уларни қонун ҳужжатларида тақиқланмаган бошқа манбалардан олади.

30. Амбулаторияда даволанишда шахсларнинг айрим тоифаларини таъминлаш учун дори воситаларига ҳақ тўлаш харажатлари мақсадли хусусиятга эгадир ва бошқа мақсадларда фойдаланилмаслиги керак.

V. Яқунловчи қоидалар

31. Шахсларнинг айрим тоифаларига дори воситалари асосиз тайинланганлиги учун даволовчи врач жавоб беради.

32. Беморларга дори воситаларини беришни ташкил этиш учун жавобгарлик ушбу Низом талабларига мувофиқ амбулатория-поликлиника муассасаси раҳбарига юкланади.

33. Ушбу Низомнинг бажарилишини назорат қилиш Ўзбекистон Республикаси Соғлиқни сақлаш вазирлиги ва Молия вазирлиги томонидан амалга оширилади.

34. Ушбу Низом талаблари бузилишида айбдор бўлган шахслар қонун ҳужжатларида белгиланган тартибда жавоб берадилар.

Амбулаторияда даволанишда шахсларнинг айрим
тоифаларини дори воситалари билан имтиёзли
таъминлаш тартиби тўғрисидаги низомга
ИЛОВА

387-модда

Бепул рецептлар бўйича берилган дорилар РЎЙХАТИ

Дорихона муассасасининг номи _____
(етказиб берувчи)

Амбулатория-поликлиника муассасасининг номи _____
(тўловчи)

20__ йил _____ дан _____ гача

Т/р	Беморнинг Ф.И.О.	Рецепт т/р	Гувоҳнома т/р	Касалликнинг тоифаси ёки шифри	Дори воситасининг номи	Ўлчов бирлиги	Миқдори	Нархи	Суммаси
Ҳаммаси									

Жами _____ рецепт _____ сўм _____
_____ сўм _____ тўланади
(ёзув билан)

Дорихона мудури _____
(имзо)

М.Ў.

Бухгалтер _____
(имзо)

Реестрни олдим _____
(лавозими, фамилияси, исми, отасининг исми, имзоси, сана)

— 24 —

30 (582) -сон

Вазирлар Маҳкамасининг
2013 йил 22 июлдаги 204-сон қарорига
3-ИЛОВА

**Вазирлар Маҳкамасининг «Республикада дори-дармонлар
ва тиббий буюмлар билан таъминлашни ва уларни
тақсимлашни яхшилашга доир кечиктириб бўлмайдиган
чора-тадбирлар тўғрисида» 1994 йил 6 августдаги
404-сон қарорига киритилаётган ўзгартиришлар**

Вазирлар Маҳкамасининг «Республикада дори-дармонлар ва тиббий буюмлар билан таъминлашни ва уларни тақсимлашни яхшилашга доир кечиктириб бўлмайдиган чора-тадбирлар тўғрисида» 1994 йил 6 августдаги 404-сон қарори билан тасдиқланган Республика дорихона муассасаларида дори-дармонлар ва тиббий буюмлар сотиш қоидаларида:

1. 10-банд қуйидаги таҳрирда баён қилинсин:

«10. Айрим тоифадаги шахсларга дорихона муассасаларидан дори воситаларини имтиёзли бериш қонун ҳужжатларида белгиланган тартибда амалга оширилади».

2. 19-бандда:

биринчи хатбошидаги «имтиёзли шартларда ёки бепул берилган дорилар учун рецептлар» сўзлари «шахсларнинг айрим тоифаларига дори воситаларини имтиёзли бериш учун рецептлар» сўзлари билан алмаштирилсин; иккинчи хатбошидаги «Имтиёзли шартларда ёки бепул берилган дори-дармонларнинг рецептлари» сўзлари «Шахсларнинг айрим тоифаларига дори воситаларини имтиёзли бериш учун рецептлар» сўзлари билан алмаштирилсин.

3. 20-банд чиқариб ташлансин.

4. 21 ва 22-бандлар тегишли равишда 20 ва 21-бандлар деб ҳисоблансин.

Вазирлар Маҳкамасининг
2013 йил 22 июлдаги 204-сон қарорига
4-ИЛОВА

**Ўзбекистон Республикаси Ҳукуматининг ўз кучини
йўқотган деб ҳисобланаётган қарорлари
РЎЙХАТИ**

1. Вазирлар Маҳкамасининг «Ўзгалар парваришига муҳтож ёлғиз пенсионерларни ижтимоий ҳимоя қилиш юзасидан қўшимча чора-тадбирлар ҳақида» 1991 йил 28 майдаги 145-сон қарорига 1-илованинг 6-банди (Ўзбекистон Республикаси ҚТ, 1991 й., 5-сон, 16-модда).

2. Вазирлар Маҳкамасининг «Даволаш-профилактика муассасаларини маблағ билан таъминлаш тизимини такомиллаштириш тўғрисида» 1997 йил 2 декабрдаги 532-сон қарори 4-бандининг учинчи хатбоши ҳамда қарорга 4-илова.

3. Вазирлар Маҳкамасининг «Дори-дармон воситалари ва тиббиёт буюмлари сотишни тартибга солиш тўғрисида» 1999 йил 14 январдаги 19-сон қарорининг 6-банди (Ўзбекистон Республикаси ҚТ, 1999 й., 1-сон, 4-модда).

4. Вазирлар Маҳкамасининг «Ўзбекистон Республикаси Вазирлар Маҳкамасининг 1997 йил 2 декабрдаги 532-сон қарорига ўзгартириш ва қўшимчалар киритиш тўғрисида» 2000 йил 5 сентябрдаги 344-сон қарорига илованинг 4-банди.

5. Вазирлар Маҳкамасининг «Ядро полигонларида ва бошқа радиация-ядро объектларида ҳарбий хизматни ўтаган пенсия ёшидаги шахсларни ижтимоий қўллаб-қувватлашни таъминлаш чора-тадбирлари тўғрисида» 2002 йил 31 майдаги 188-сон қарорига 2-илованинг 1-банди (Ўзбекистон Республикаси ҚТ, 2002 й., 5-сон, 27-модда).